

四庫全書

集部

欽定四庫全書

集部
待制集卷三

詳校官中書臣呂光復

侍讀臣孫球覆勘

總校官進士臣楊懋珩

校對官中書臣楊世綸

謄錄監生臣張德燾

欽定四庫全書

待制集卷三

元柳貫撰

古詩

七言

送馬伯庸御史出使河隴

河隴隴坻天西壁御史嚴行八十驛風驚大鹵幕初乾
雪重穹廬寒未釋入關先見父老喜出節始通氓隸逆
鯨鯢既戮海為清蜂蠆雖微尾含螫急宣聖德慰荒遐
盡洗民瘼轉疲劇當今至尊御疆宇坐朝法宮受圖籍

暉暉陽曜燭天垠殷殷春雷行地脉周公方宏治外規
汲黯豈負居中責固謂真儒識邊瑣徑煩拂士迂朝蹟
可能高戴觸邪冠不使橫飛征蜀檄君行萬里從此始
人生百年俱有役副藏待子馬遷書重贈慙余繞朝策
歸與空腹貯岷嶓促此南風談禹畫

六月十五日大雨雹行

是日
月食

日月相鬪鶉火中晡時欲息雲埋空雨脚初來雜鳴雹
雷驅電挾聲淪淪排簷倒檻揮霍入犀兵快馬難為雄

中休頗意絕崩迸轉橫更覺加銛鋒亂拋荆玉抵飛鵲
恣擲挑核隨飄風坐移向壁防碎首急卷巾席何匆匆
上天號令豈輕出摧殘長養皆元功陰凝陽爍鬼神著
氣有至反誠則同想茲試手鼓萬物特欲振槁昭羣蒙
齋心變貌謹天戒嗚呼生意無終窮

送王元叙赴潁州同知

元叙以世澤入官始仕
登州而其先人嘗為庶

訪使者浙東有聲至元間故
與余識今別二十八年矣

浙河東開繡衣府正士持刑吁可數王公風裁獨近古

面目冰寒嚴刺舉我初冠首羣游序偶坐時聯諸老語
當堦蘭玉秀嫵嫵間亦從人詫懷祖二十八年如過雨
相見都門鬢生縷緹車再駕腰縣組猶因銓曹覈班簿
學維有宗政有譜限以門資豈其叙密法深文已如許
貌取于何知子羽是州雖小鄰陳汝適彼其郊云樂土
媿媿耒耜偏宜稔村村雞犬無行虎西湖山色誰爭所
攬結何妨入樽俎登穎東西從外補要與老坡同一武
攻詩琢詞母太苦忠信宜民民自與使華持節紛旁午

大忌孤高矜譽處道迎督郵首頻俯飾具先須修簋簠
固有深藏稱善賈不則蛾眉成妬女青雲易致無幽阻
收拾聲華繼諸父天寒遠別衣當褚祝規有言君聽取
我輩交情非詡詡

蔭補令初官與武階元叙再轉
乞換文資有司以為不可乃已

送陳景仁都事使往雲南調選

往時文子初使滇吾詩疊疊當離絃上言黜陟有操柄
在爾筆削行微權今君過別又繼往淒淒涼葛仍三年
廟謨制勝思服遠視彼裔土猶郊廛大邦小邑實維繫

立監置尉皆官聯生民百萬等休戚啟擬未必非材賢
尚煩著令通朝士執簡徃試天官銓况君沉敏有注措
雅頌自足資言宣度長絜大固應爾拔十得五猶超然
龔黃卓魯不並世器使徃徃規其全當從謠俗詳考覈
勿以吏議深拘牽和柔豈曰由地產獷戾尚可因人遷
方今天子重法祖憂軫最在西南邊布昭德意歌樂職
王路恢廓行平平朔風吹空淒以緊君馬既駕何須鞭
瀘南瀘北經百驛到日想及歸鴻前玉節高持飛蜀雪

錦囊滿貯傾蠻烟嗟余漸老守章句好遊亦有青行纏
今朝執醖忽內熱長吟短諷還成篇胸中九域苦未廣
借君尺紙圖山川

寒食日出訪客始見杏花歸而有賦

京華塵土春如夢寒食清明花事動偶賒佔畢數日閒
似釋頰肩百金重今晨訪客出城東馬上風來亂吹墮
穠桃靚李杳然空山杏一梢紅聳聳浮暉隔樹豈饒春
麗色迎人太矜寵后皇賦命幾何偏早秀遲榮徒倥偬

嬌姿不並歲寒香殘香祇作籬根擁物情如此乃自嗤
一官坐得三年冗烏騰兔走苦相催老矣髻絲今種種
紫鳳憐渠短褐穿白鷗負我歸心勇故園梨雪想繽紛
月下有樽誰獨捧涓滴長令酌潁蓬何用百家營守冢
寄聲為謝歌泥中補兀吾猶完趾踵

敬題皇姑魯國長公主所藏唐周昉畫金德星
君真形圖

星辰上羅天文章帝宮太紫巖中央長庚啟明左右當

西柄下揭斗口張浮空翕絕流金光雲霧降精神杳茫
乘之無際運無旁中有顥氣隨飛揚潏然玉色含微陽
翠綃蒙袂儻瓊璫手彈琵琶韻清商商聲按節秋思長
銀河經天浩湯湯跂而望之河無梁徃來倏忽難為詳
但見初月如懸璜洛書五行著襍祥始終德運推柔剛
云此太白乖其方義虧言失多淫傷神無異體智有常
我夢見之覺徊徨披圖駭目得未嘗粉墨形似爭毫芒
作者周昉傳自唐能品上上題明昌王家甲觀開畫堂

瑤華承宇藉以芳升
散潔漿祭於祊靈衣被被舞執璽
神保至止辰維良駕言為織天孫裳
吾聞五曜持乾綱
龍騰虎拏互低昂
星官執御調玄黃
照燭九土窮八荒
東西咸池直扶桑
下貫天畢晶煌煌
煌煌之晶降為穰物
不疵癘民不殃
千秋萬歲國乃昌

贈寫真張翁

翁居京城南年八十一神清眼碧蓋進於其技而無求於世以自足

焉者也

傳巖審象形何形麒麟設色非丹青肖圖如以燭取影

豈謂炬火無晶熒腰間插箭氣自倍頰上加毫神則寧
古人藝聖不兩至心動手應夫誰令不誇筆墨工點點
欲與河嶽開英靈京華冠蓋萃山藪風髮萬騎雲千輶
前行衛霍後褒鄂佩服憲憲登明廷俗工寫似不寫韻
却詫果羸非螟蛉或攀有若擬玄聖僅類蠟紙摸蘭亭
我雖意見頗自可豈固賤耳疑羣聽張翁八十貞靜者
城南巷居晝掩扃客來拂絹出新鑑能事逸發無畱停
一毛一髮生意足造次參倚象儀刑由其天機勝嗜慾

愈覺眼炤如流星承明待詔綬若若晨朝索米儕優伶
徒誇世有青紫檀豈恨我屋無芳馨吾聞畫者多善幻
倏忽變化開玄冥安知神完意自定伸筆已似行春霆
草間陋質不須寫二十八宿羅天經得閒携酒就翁飲
傾倒沙頭雙玉瓶

劉常州宅對菊醉歌

菊花高株高一丈葩萼垂盃葉承掌撓先節物作重九
亂點秋光入屏幌黃黃白白鬬新品大朵如擎小如仰

或稽紅紫當獨秀詎識幽嫺無競爽天工似爾費雕刻
人力可堪專灌養京華樂事全盛日隙地買栽隨意賞
誇多直擬衛霍室豈顧家微百金享常州使君開畫堂
簷網連榻出虛敞集芳作譜為娛賓賴有筵前玉舟兩
不知誰舸載傾城但道我屋無藏鏹過從數客問前茅
出節何時試英蕩可能輕別負芳期遂使寒香淪宿莽
孤根有託俟歲晚急景如流嗟運往我歌君飲君當酬
明日霜河催去槳

出北城獨上秋屏閣望西山烟靄中漠無所見
北江負城沙似磧帖岸微行誰所闢折旋殆類蟻泐封
漫漶猶如鴻印迹風髮披披鞍兀兀去馬浮曦正相逆
入門平步得高層身與危闌爭幾尺緇袍年少不嗔來
拂掠胡床趣敷席鉤簾意擬見西山雲亦何心故蒙幕
我疑玉女畏迎將且懼詞鋒恣彈射豹藏惜此管中斑
黛點羞渠眉上碧不然洪崖仙者過霧縠烟幘羅什百
詎容左右覲昌丰祗許依微攬芳澤我時坐定深得之

大小往來成一易青天白日豈嘗無好懷轉眼難尋繹
祝融開面索新詩五老破顏愁惡劇我持一影行萬里
負舟而來山有力塞華寧俟九春期繫匏未了三年客
正須慰藉管城公重此提携煩脫幘

為蔣英仲作顏輝畫青山夜行圖歌

前山濕霧方濡濡後山蒸雲如鬼驅松蹊行盡迫黝黑
壁月正掛寒蟾蜍問翁蒼茫何所途投館莫有林間廬
枯梢尚鳴風勢急隈岸欲渡溪流麗沃洲天姥雖峭絕

無此原壑深盤紆固應豐城牛斗墟龍劍夜出乘飛符
神人仗氣挾以俱虎豹旁躡雄牙須世間何物珊瑚株
不可襲翫矧可誣青峯之巔野水碣獨往似是仙者徒
心融意定不少假收攬竒怪一筆模蔣君閤朝攜過予
墨色照几晴光鋪老顏未老為此圖柳子歌罷三嗚呼
南州雙壁范與虞君當請賦傾明珠

出新城門至北沙下行視陶瓦

二年居城傷局促腰脚未免成堅頑西山迎馬若尊從

隔江正面開雲鬟想渠故要詩料理況此已復秋闌珊
青林紅樹高下映潦水卷盡霜痕斑村墟雖小有雞犬
砂行十里到即還黌宮改作土功起牆事休來農務閑
直防苦窳厲陶旋遂走犂角勞鞍轡古云薄物毋芥蒂
特取盡已方安安心為形役語非足動靜自我操其端
爰從憂患出苦力偶竊祿食猶空飡西風輒贈好山水
起我平生清淨觀夢遊已了豫章郭飽目尚欠匡廬山
胸中塵土要淘汰微此得不嘲天慳吾人所賦實蹇淺

報貺豈有青琅玕

後木龍淵歌為陳景常作用其韻

我齋誰名名衮斧有肅其趨坐軒廡坐來歌徹木龍淵
卷雨輸雲出江潁是淵無龍安有水土石夔魑非若伍
想當塹荒刊翳初已辨枯槎閱終古剗形實藉水為鋒
騰身尚恐雷憑怒沙湮浪汨幾何秋翕合蒼精配金虎
不然因會戮防風殘骸槁骨相支拄專車剝盡化控揭
羞向人前承樂祖他生劬書來自獻問爾非臯我非禹

直將夜思破漫漫往和谷聲呼許許又聞用水作寓龍
致得陳寶祠中語降神報貺不在真獐鬚逆鱗吁可數
湫移偶爾閣汀州轉眄遂與波濤阻幸依硯席聽吾伊
免逐泉珠疑賈豎是龍是木不渠嗔但覺噫氣吹還煦
物化為人人化物上天下田雲作渚木龍招君君徑歸
袖有淵神三尺雨故饒龍文不成謳未害水人能起舞
誰為斧鉞誰為袞春秋傷麟禮傷鼠還君置我一束芻
許可當年陳仲舉

題高彥敬尚書竹石圖

尚書胸中貯秋色翠石蒼筠誰點筆當其被酒氣初酣
芒角森森出矛戟墨痕散作紙背光虎卧龍騰俱有迹
伯夷去後凜清風叔向生來古遺直見之冠佩不敢燕
矧是圓壇方薦璧房山西北弁山南二老交情嘗莫逆
陶泓毛穎始受呼不寫穠芳寫寒碧流傳此物成宅相
鈿軸縹囊新潢飾老夫饒口近更滋便欲歸山煮吾簞
詩成題作主林神未害西湖渠不識

雪夜苦寒泣

一冬愆陽積之久陰氣乘凌如決驟飛雪纔驚窮臘交
初寒浸逼新年後宵眠輾轉成跼躬晨興播洒愁龜手
羣山藏疾巖骨峭下瀨膠流溪腹厚歎歎瘦竹豈堪支
植植僵株如恐仆寧無魚淦入淵潛固有獸窮離曠走
兩間自爾埋翳瞶萬物于何遂牙紐良年疲繭動畏競
窮屋棲遲甘老醜朝盤至午得饔飧凍盥經旬無滲漚
堆床敗絮可能溫弛擔枯樵聊足捫咄茲恠見駭南翁

啟我夢遊追北叟天時豈久拂常經君子唯當堅素守
既欣瘴癘掃氛祲將喜來牟盈壘畝遲遲陽德際朋升
杲杲天光發豐蔀治朝有道容我拙日飲山堂無事酒

自勘居山所作詩題其後

世言作詩能致窮遂指此物為妖凶不知善藥不龜手
時來或取通侯封我生屢涉憂患境所不偶世由大慵
有言即吐非尚口譬若氣至鳴蜩蛩何嘗夢見古壘沉
頗願濯出清芙蓉嘲啐未免雜淒楚姿媚豈復能昌丰

宦遊足跡半宇內顛毛雪白身龍鍾歸來十事九多忤
顧有愁緒無歡悰尚餘結習在篇翰風雅遠矣吾何從
蓬蒿環堵適自好乾坤萬象誰當供唯應未斷綺語業
豈意更留鴻雪蹤一年藁卷盈一束論石猶堪幾簾容
夜郎東屯兩醉叟流落西望千山重胸中繡線雖未縟
不得帝袞親彌縫蘇梅黃陳後起者世豈不淑乖其逢
九州四海莫予騁一生坐受饑寒攻咄予六六牛馬走
仰視遷固其猶龍賤生無用此語實何況竊發言非雍

榮華豈是拙者事
圖畫將為後世宗
自歌自詠自拊几
和予付與風號冬

三月十日觀南安趙使君所藏書畫古器物

三月浹旬新雨餘
市河一舸如浮苴
言尋佳客趙橫浦
步入城隅門巷紆
褰簾簾迎揖坐便
坐深炷爐熏呼茗
盃
硯屏方截紫綺段
楚瑤秀列珊瑚株
是家素號虹月舫
載畫盈簾書盈車
客逢好事要審鑒
便肯解褚傾囊儲
相看貴德亦貴物
古玉錯落排筵敷
鹿盧帶鉤環珮玦

鞞鞞昔將承屬鏤佩章六紐四官印篆畫刻深銅質麤
配之衝牙奉君子貫以繫璫聯金魚連錢驄馬琢文玉
圉人側立垂裙裾神工定復煩剗剗赤刀故想來錕鋹
次陳鼎器論製作商周秦漢焉可誣玄武實水貞實醴
腹背翠錯提梁朱最奇劍槩尺有咫綠玉龜鱗純體膚
精銅歲久剛性在間閱燥濕其無渝銓量畫品差甲乙
錦標玉軸隨伸舒庭光古佛生梵相滿月在水蓮生趺
盧前吳從筆鋒勁履絺承蜩玄化俱瑤池仙會上中卷

細巧自是吳元瑜雲霞樓觀遞隱見花竹羽毛工染濡
絳旌飄轉紫簫發步輦道守從千瓊姝終篇八駿惜既闕
詩亡可補此置諸意夫鬼物揜疵吝免彼耄荒留歎吁
徐熙葩葉妙設色塵昏蠹蝕猶鮮腴古絹一段寫秋意
芙蓉鵝鵝連茭蘆夢載鷗夷浮浩渺此興初不緣蓴鱸
七客張萱為誰作濃墨大筆色不枯五人人跨一善馬
一跨烏犍一蹇驢印窠慘淡悅生字豈曾藉入官中帑
穰穰畫苑姑撥棄伸眉更請評法書二王真迹胡可得

硬黃數幅真唐摹蘭亭五字損不損肥本瘦本班班殊
如人身口耳目具神采乃在頰上鬚虎賁舉樽雖甚似
優孟抵掌何其踈世間楮墨日弊弊欲駕跛鯨行天衢
南唐常侍六書學凌轢斯邈開榛蕪雜詩流麗滿一卷
銅甬篆法無能踰金繩鐵紐莽回互山蚪海蜃爭騰驅
嗟予欲讀屢拊口形求意索且須更泰山繼起石鼓後
李監掄出張先弼向微二徐為啟籥此道湮滅誰昭蘇
真書生行行生草飛白籀隸同一樞張顛草聖入三昧

小楷妙合褚與虞郎官石記毀已久百金可有墨本無
世之珍物豈待贊題識况復經鮮于綺園角夏四神坐
刻字寸許無葩萼永平元舅紀功頌燕然何在捐墨烏
厓鑿野刻百數種傳觀一二日已晡餘歡未盡謀再至
榜人催發吾歸歟莫投蕭寺微雨作昏燈照影溜鳴渠
冥懷且復領其要回向灼觀心地初百年蓬累大宇宙
蕩搖不啻風中旛寓意於初形物著尤物亦能為我娛
滯形小足致偷奪大成控頤傷口珠牛李相傾坐石袍

王涯複壁嘻其愚吾徒適目取一快彼毫巧者方睢盱
晞予嗜古與君並見獵時然思負嵎題詩紀載實覩縷
若遇匠手當刊除同觀六士梁越產王揚三子甘陳予
交遊聚散等萍絮春風渺渺吹江湖徵詩如見所見者
後有畫者傳之圖

中秋夜半起看月戲題長句調靜遠子安二友
山長

青天明月不可呼何況有酒無江鱸寒燈顧影歎離索

如此良夕焉能孤三年家居三見月此獨不見為躊躇
夢回虛館漏聲急碧霄瑩淨開冰壺仰看圓魄掛屋角
俯見流光穿座隅振衣起舞青桂下白露泫泫寒生膚
他宵得酒有明月山栖未免思江湖闔閭城東庠舍靜
庭列桺榆三四株暗蛩振股和鳴杵栖鵲翻樹如驚弧
素娥似為我幽獨故出光景相嬉娛不然顧兔養靈魄
何以拭淚縣方諸百年心賞半塵土豈獨負丞兼負予
好懷都付橙蟹月淡味寧忘杞菊厨陰晴聚散胡可擬

雲翻雨覆無須更清琴在手不成弄且復題詩訊大巫
寄題惠山華氏溪山勝槩圖

山如尊卣溪如籀洗刷秋光出深秀市塵飛不到亭臯
翠幌朱簾閭白晝主人宴坐與天遊收拾至樂歸之酒
絲管惜惜大雅筵荃蘭泥泥離騷囿以心觀心迺如此
更為溪山發神媵水榭褰開尋丈間物華掇出雕鏤右
客來問石石忘言客去留雲雲為守惠山山中第二泉
水品古今誇滿口井幹餘泣溢為瀾落毳飄來鳥驚救

高人但取一賞足擇勝誰能占幽茂兩腋清風起振衣
百年陳迹供回首寄聲鷗鷺莫相疑還我靈龜養耆壽
題趙敬叔所藏龍眠飛騎習射圖

元豐盛際臻重熙駕幸寶津方戒期材官騎射選精銳
人偉馬駿由天姿雕弓引發赤羽箭絳綃繫在青楊枝
班中驩言斫髯射好手莫是六州兒拖毬飛礮最鮮中
十中三四纔稱奇人如明星馬如電日色眩轉交龍旂
彤庭賞雋賜金帛周廬艷目生晶輝激揚材武振士氣

正藉廟略能匡時集英排仗候廷試畢景未休宮漏遲
南宮仙伯預宣押應奉殿門因縱窺天上寶圖唯我見
宮中秘戲少人知白筆追摹得神駿五米不復煩彰施
雌堂清翫要有屬太丞內署知為誰慶元逆數到元祐
畫江自固運已移紫陽語繫錫山後法雲舊案重稱提
題詩叔簡定王氏入官延閣方然蔡嘉定章公中執法
二年已已升中司兩公出語各臻妙驪珠滿橐光離離
承平兵制况在矚燕安鴆毒終難醫趙侯鉤致自甌粵

啟襲傳翫晴虹披玉山汪氏所珍蓄再落人手廼得之
霜蹄十六脫其半騎者臆語如指麾由來得意忘彼象
若也補亡非是詩何況龍眠記畫意字字透紙沙畫錐
天球河圖悵莫覲寶玉大弓欣有歸材如趙侯當用世
縱靶已並金飈馳移人果豈在尤物但視無逸為元龜
與用章戴生同度淡竹嶺夜宿山家

一溪屢涉溪流淺廿里窮源終絕巘雲間仄徑細如縈
霜後枯葦齊若剪沙崩石爛阻危攀磴斷崖縣還斗轉

已驚汗袂泣餘滋更擬班荆息微喘未昏斜照白波淪
直下遙空青霧卷粵初川嶽各流形自是陰陽始昭辨
誰開壑谷通片雲重為封圻制鉤鍵神工使解鑿崔嵬
世路何庸增連蹇舍車未免役孱軀揜策聊將收勝踐
粉榆連蔭壯且哀嫻友關情行孰遣吾生已付一浮漚
此足寧堪幾重趼莫投山館睡齁齁雨撼窓扉燈覓覓
寒雞呼夢報詩成曠懷直為朋知展

載酒堂詩

并序

蘭溪州同知州事彭侯震卿為南寧軍判官
日嘗訪得蘇文忠公載酒堂遺址築室肖像
即修祠事朝野名勝徃徃形之賦詠予知侯
有懷賢尚德之心則夫宜人之政是不一書
而已作載酒堂詩詞曰

東坡先生如龍鸞世人疑其欲飛蟠九州四海不容足
攝身徑去窺髦鬢南荒萬里儋耳國帝遣海若開奇觀
潛淵挾得睡驪目思山夢見峨眉彎颼風惡浪吁可駭

土芋脫粟纔供餐
黎家兄弟好事者
小酒初熟生微瀾
卅童迎路吹葱葉
門東刺竹西牛闌
扶攜歸去常半醉
流落生存重一歡
四黎善善君子類
若比章蔡猶蕭蘭
天乎木鐸何望爾
蠅之附驥渠非難
誰尋雪迹到鴻爪
正用載酒標堂顏
百年文獻隨草莽
庭階蕪沒井且簪
風流別駕彭夫子
未負進賢頭上冠
是心尚德甚飢渴
挈取舊物還祠官
書名小摘枕榔綠
薦俎時羞荔子丹
海邦夷俗雜蛙黽
茲事信為風化端
音聲固有合琴瑟

嗜好果豈殊
醎酸竭來蘭
陰語吾故緇
衣三昧三長
歎
咄哉愷悌神
所勞雲路矯
首者扶搏

雷琴行為薩仲明賦

中有銘云天寶二年雷威造

美琴論德兼論質如玉函和中
縝栗蛻形鍊骨龍體成
九轉丹功在髹漆唐人妙斲稱
雷威桐材既尋天予之
當時重購已莫致到此珎秘知
由誰七百年中幾奈海
大物尚隨人代改庚庚玄理似
鮐文鬼蓄神絨端有在
薩君昔遊冶城東傾倒囊褚携
松風道逢陸子驚再拜

世乃有此雲和宗雲和收聲吁已久滿耳淪哇聽欲嘔
鼓磬非因襄武亡絃歌實自猗那首執器求道道乃全
聲形精感人其天薦之廟郊鳳當下盛際追還天堦前

寄題陳子敬錄判澹古齋

光堯論書稱澹古誰其采之名子所想應蜚口厭芳辛
且憚取妍趨媚嫵治心養氣豈無端致一凝神要有緒
雖微鼎寶載升牲劣可堂筵容布武開卷明明揖聖賢
弄琴昵昵羞兒女是中趨尚乃大佳俗下愛憎難遽數

玄酒猶堪饗廟郊疏布何嘗愧文黼一溪晴綠看揉藍
二頃圭田催釀黍天機誰者得之深為問人間養生主

題高尚書滕紙畫雲林烟障圖

髯翁昔飲西湖渌滿意看山看不足醉拈官紙寫秋光
割截五州雲一幅吾聞妙畫能通仙此紙度可支千年
祇愁蓬萊失左股六鰲載之飛上天

題陳子仁屏間新作長松疊障

陳子胸中有奇句墨瀋如雲時一吐不知毫穎挾何神

頃刻移山起烟霧紙屏滿飾素光搖眼明見此青霞標
塵埃兩屨我顏厚為子三賦淮南招

介福堂詩為張繁昌作

繁昌之祖藍山先生為
紫陽之學鄉人築室奉

祠列之學宮
繁昌名純仁

藍山張氏家有堂素屏樸几六尺牀堂中壽母八十強
鬢髮未變雙瞳光有子朱紱垂銀章有孫經明貢於鄉
彬彬濬發文字祥彌甥亦已第奉嘗歲時拜慶儼趨蹌
脯脰薦豆醴實觴龐眉一笑回春陽樹萱在背英煌煌

和氣克物天降康繡文新添晷景長是家穠裝連墨莊
徃徃刈熟盈囷倉廼翁談經臨象璜青矜弟子如雁行
上窺雲谷開微茫著書克麓名山藏精廬百世饗烝嘗
祖孫播穫歲乃穰此道付與今繁昌政學優優問彌彰
栽之培之至敷芳本深木茂理則當母昔寡居稱未亡
肆今五鼎食有魴介福堂成貯縑緗大篆題榜卿雲驤
賓客上堂聲必揚有來觀樂歌泱泱天津之女工織襄
言將為母製錦裳他時花誥鳳銜將併與縑藉克承筐

蟠桃種在瑤池旁，碧實纍纍秋露香。仙人畀以邵老方，
執鬯起酌天瓢漿。金華小兒牧羣羊，疇昔授道張子房。
作詩寄壽言荒荒，母當啟鑰分玄霜。

觀宣撫資政鄭公追復元官誥詞題其後

鄭公進仕由咸陽，才則有為時則否。主和正爾持死力，
蹙國寧甘陷戎醜。廟堂手挾震主威，壯夫奪氣關其口。
銓封朝上夕投荒，公掄止之言弗售。自茲違弼意，稍垂
未必蓄犬真堪嗾。長孺居中誠少慙，相如使蜀非徒厚。

屯耕雖則致羸羨反使煩言推罪首江州獄具徙封州
妻子流離窮見肘朋淫乃更滋瘴癘亡鑑不嫌殲壽者
台星中圻山亦頽國不負秦秦自負明年手詔收權綱
追復流人洗瑕垢從官恩典視生存還畀其家猶固有
悔心一發本諸誠訓語明明知所受誥綾六尺載書詞
印窠滿幅縈蟲紐東序河圖曷足多繼世子孫當寶守
天生忠賢豈無意毀譽方來在身後秦顛鄭善古有云
易旣深耕視終畝國非其國六十年權以春秋夫豈苟

檜如狗彘人不食公如龍麟駮帝右矢詩追繫辨姦篇
太史賤臣牛馬走

草堂比丘尚賢為報母故刺指出血煎鍊如法
命其弟子如琬以小楷書妙法蓮華經一部七
卷匱而藏之總勝閣上予嘗閱是經隨喜說偈
昔紹興中有僧寶元刺血寫金光明經全部施
是山今尚在焉

我觀衆人與我身通體氣脉常充滿云何觸目生痛楚

關節脉理元相管四支百骸皆有血流行膚革初無溢
以鍼刺指即得之渥丹濡濡供漬筆法華妙經佛所說
經凡幾字字幾畫蠅頭細字滿夾書天龍夜叉承指役
血出尚賢書出琬是師弟子本同性龍華會上昔相從
信心一發超圓證縣知是血母所生為報母恩弘法忍
一鍼一滴聚成勺書經有盡血無盡願茲寶印金色光
載母上生遊極樂妙莊嚴域常現前是經在處獲尊閣
今生賢琬兩比丘前身寶元無乃是五色雲臺舍利幢

藏海蓮華相對起我嘗奉佛樂我淨與聞種種殊勝事
一朝拾得王髻珠五十小劫皆真際昔人持經向空裏
雨尚不能至其處況夫性血之所書無量諸佛垂善喻
大雲所覆甘露濡四海九州同稽首我今隨喜為述偈
子墨客卿當諦受

黃晉卿提舉授官初歸予偕敬叔輕行訪之假
榻湖邊滿心僧院明日病作敬叔先還予畱就醫
藥數日乃歸予少時嘗聽琴此院今四十年矣

湖漚僧齋聽琴筑間四十年來不速秀眉一衲今雪顛
迎門坐窓煮茶熟自敲竹檻喚童歸更拂藜床延客宿
客方病起氣如絲夜挑歌眠屢驚觸晨興體惡頭岑岑
三日忘飡不思粥歸者先歸留者留賴是吾生耐幽獨
疲菴猶資藥餌扶過存厚謝親朋辱陰陽致寇孰乘之
小待神完理當復行藏一迹大累人畏影偏教影相逐
莫途久寘折腰具高誼能忘軟脚局湖山款款惜重違
雨色雲容看未足寧能將此不貲身坐耗齋厨兩囊粟

鶴背西風去意輕
命僕肩輿催結束

題錢選畫僊居圖

仙人羽駕青雲輿
遊戲八極凌空虛
神山縹緲在何許
意所到處皆方壺
畫師豈常與之接
夢時識取醒時摹
聯棟紫房縣薜荔
交柯碧樹排珊瑚
琴書整暇筵几靜
左右絳氣橫扶疎
武陵溪曲仇池路
人迹往往通樵漁
仙凡一膜初不隔
悟迷異趣何其殊
奔輪駭轍世多有
逐臭未免如蟲蛆
吳興老錢招隱曲
駕言設色調方諸

披圖三誦歸來乎盍亦視此招搖車

過閘行

二漳合下如奔矢絕出為河容匯水南橋北柁越埭來
後挽前抽爭一跬懋遷物品實王畿嶽貢方輸千百衆
商功已覺十分贏趨利真成三倍市聖人乘運智者謀
尚憶當年河事始向非廟筭屈羣策安得舟航若平履
天開地闢幾何年禹迹茫茫大疆理毋將本榦貳強弱
所務有無通遠邇日高捷閘放三版津人絕器舟銜尾

河渠使者水衡丞走馬西來呼起起

松雪老人臨王晉卿烟江疊嶂圖歌

君不見帝堦王家寶繪堂山川發墨開鴻荒重江疊嶂
詩作畫東坡畱題雲錦光又不見後身松雪齋中叟仲
紙臨摹筆鋒走樓臺縹緲出林坳蘆葦蕭蕭騷藏澤數白
雲飛不盡青冥百丈牽江入樊口墨花照几射我眸我
為拏芳歌遠遊胸中是物有元氣世上何所無滄洲我
疑此叟猶未化瞬息御氣行九州五山四溟一觴豆瑣

細弗遺囊褚收故能援毫發天藻不與俗工爭醜好楚
山雲歸楚水流萬里秋光如電掃拈來關董散花禪別
出曹劉斲輪巧披圖我作如是觀毛穎陶弘共聞道嗚
呼相馬亦相人駑駘豈得同翔麟舍夫毛骨論形似如
此鑒賞焉能真後來有問延祐腳意索舉似吾方歎

送蕭從道還蜀歌

并序

蕭侯從道自京還蜀艤舟廣陵薄遊吳會邂逅一見如故交焉蓋侯以遼東貴族累世將

家早從征伐藝勇有聲襲父爵為萬戶鎮保
寧泰定末上屯耕便宜京師會闕外稱兵侯
受詔前行寨旗斬將功最一時亡幾雲南大
理亦憑險擾邊廷議遣使持節分道督戰侯
與在行獨由烏蒙深入巢穴折其鋒銳凶渠
授首逆類悉平幕府上其平南之績吏持微
法賞典未下侯載家徑歸朝廷制爵祿以馭
臣顧於侯係吝若是邪侯方將覽觀山川形

勝以攄發胸中之耿耿然自此沂江入蜀魏
吳戰爭之故墟遺壘往往而在弔古興懷可
以慨然而賦矣因貰酒酌侯申歌以送之

天歷之元邊釁起反兵攻闕如突豕宴安鴆毒五十年
霸上棘門徒戲耳相臣隻手扶乾綱虞淵取日宣重光
雷行固已觀用壯龍戰不必疑無陽蕭侯蜀帥方入奏
受鉞前驅渠敢後鼓行三闕氣既倍往往短兵能獲醜
係組纔來軹道旁奔鯨復振潼川右樞庭論將豈無人

懦夫上馬還逡巡念非蕭侯材勇者詎足潛消蜂蟻屯
傳聲六詔將深入已覺蠶崖鐵騎陳仁義之師若時雨
大獮獲禽非我所坐令萬里哀牢夷回謝天威迓鑕斧
捷書徑上清暑宮節制重開紫微府論功亦或陷深文
霸陵閼殺故將軍京華再見梅花發春色遙從錦水分
相逢弔古吳臺下壯士寧為時所捨載愁萬斛壓歸舟
舟經灩澦高於馬江水萬派從天來江花錦帆相映開
長歌繫劍歌莫哀隨世功名何有哉

韓魏國忠獻王七世孫植甫家觀王蟬冕畫像
文奎瑞宋三百年英雲五彩章賦篇出藩入從國秉重
勢如九鼎安堂筵西戎小醜罔干紀北門三軍常晏眠
誰為社稷存至計藉此粉墨開凌烟崎嶇南徙今異代
啟匱傳觀玉色鮮使時殷耆猶弗拂安用蜀業圖其偏
神人玩世未嘗死剛風乘之游九天李君執御我問世
更恨凡骨何能仙

歸度太陽嶺

北南二嶺中我居出入堡塞險且迂方州治縣能弗往
往則盤辟徒舍車金華枝引巒岫屢丹霞翠霧交吸噓
人影翔天雲在下溪流宛委旁行書浮嵐開道通兩屐
落日掛樹明三珠是節秋高氣初肅喘息微汗衣成濡
崖間野菊雖瑣細黃艷迎人偏靜姝連峰轉想畫為假
怪石特疑神所刻居庸桑乾蠹天北我嘗騎乘陟其碣
彼誠崖絕猶戴轍此更礪礪難容跼尻輿神馬意所適
四海八荒同一驅咄哉屈於遠遊燭撰轡欲繫扶桑株

天台張節婦吟

天台山中百本桑枝葉泣露晞春陽女婦采桑葉肥厚飼
鰥作繭盛滿筐盆手繰絲絲萬緒不將織杼為練綳練綳
縫衣破誰補凍絃絀瑟聲淒楚瑟聲淒楚還自悲婦昔紅
顏畫眉嫵羅襦未綻變苴哀嫠姑在養兒在乳家貧百需
叢一身惡筭我是未亡人續燈明分夜窓讀糲膳厚具
高堂珍窠傾雛弱風復雨扶宗一節四十春婦為壽母
兒亦壯白髮舍飴坐堂上荒烟喬木幾家存况復有人

修薦毫天憐忠貞嘗獨厚世微表厲吾安放詩書流澤
稱清門婦家有子且有孫過車入里見憑軾飲其德者
如衢樽台山峩峩水深深明月下照秋無陰絲聲按節
指可尋一彈彈為節婦吟雅頌自足開人心世廼有此
瑤華音

題瀛洲仙會圖

巨鰲驤首戴三山海波不驚坤軸安方壺員嶠彼何境
靈氣布濩非人間金銀觀闕勢如翥攢林珠樹垂珊瑚

猿題竦擢明河畔閣道橫截浮雲端仙人來往羽衛備
或駕紫鳳騷青鸞霓裳法曲舞袖破執樂瓊姬神彩閑
時容下界攬薌澤却對連峯愁髻鬟芳龍飛去杳無迹
烏陂兔走雙跳丸蓬萊舟近風引卻三島靈蹤難重攀
是誰摹寫枕前夢欲用鐫鑿區中頑神仙固多狡獪事
世儒論著存不刪賈生賦鵬語大道後有達者當大觀
忽然為人化異物斯理幾何堪控搏仇池洞穴通小有
神清玉宇標孱顏彼皆因竟示生悟直啟真源湔垢癢

嘆余質薄迫世隘輕舉便擬凌飛翰披圖愴恍縱玄覽
託乘浮游窺九闕無窮八極冀一遇迂道遂與松喬班
登年閱世要自致何必辛苦成金丹

題臨本捕魚圖

斬伐聯艫縛為柵中流起罾如舉纂取魚計獲有且多
撥刺銀刀長數尺船頭五兩受風偏雙漿乘之轉山急
夜涼星斗滿川垂烟銷鮫鰐騰空擲江鱗穿柳趁朝墟
白粲裝囊供日食人生漁樂樂可知雲月為家天一席

翁歌媪醉兒嘯呼有酒盈甌無事役前林楓捩疎欲凋
後岸茭蘆寒可剔沂淮入汴昔所經野步荒郊曾自歷
祇疑輞口舊山川猶是高人畫時迹世言圖畫能象物
風土班班證今昔乾元去亂幾何年右輔分畿無數驛
畋漁樂業廼如此休養真堪遂生息臨摹甚似誰所為
大筆中藏十鈞力君不見舟車入筭析毫釐漢皇經國
國未卑雖云山澤有厲禁魚麗以後非無詩

題龍眠釋迦出山像

明星在天斜漢落佛道靈明魔道弱修行已證等覺位
不顧身形瘦如削華縵垂袒雲半肩步出山來赤雙脚
文殊低眉普賢笑滿谷天風韻天樂青蓮貼貼印虛空
白象耽耽係羈絡自茲應物如洪鈞五陰五濁皆清廓
龍眠皆是會中人以心應手親描摹纖煤利穎發其神
聖鼻鉤輪無此斷流傳什伯甲子餘玉采珠光破冥冥
鄮江古寺秋日暉洗滌翳睛煩發籥稽首調御天人師
優鉢曇華開一萼

蕃王獻寶圖

皇天饗德親至仁四夷慕義悉來臣押奚兩番稱使者
稽首自請輸庭珍梯航琛賫慚後至象犀珠貝克前陳
髦蠻何由舍愛吝聖化如天能服馴仁柔義懷乃至是
聲驅威懾非其真君不見周公居中秉周禮王會書成
白環至按圖索驥豈不然貞觀興唐有畫傳

題王宰所藏墨龍

飛廉為御豐隆車憑陵九淵傾尾閭誰與發墨啟玄奧

神光躡斗旋其樞湖邊竹屋清夜徂防有没人來摘珠

商學士畫雲壑招提歌有序

諸生伊埒布哈嘗從其父官洛下強學好修
得於山水之助者也集賢侍讀學士商公見
而器之為畫雲壑招提以贈乞予作歌公此
圖意韻閎遠生能求之筆墨之外將不由是
而有發乎

高為巔峯下為壑羣木慘慘風欲作浮紅動翠何許似

別嶠殘雲明佛閣眼中疑此洛南山只尺便到龍門灣
暗潮已落洲渚出新月未上漁樵還商侯胸有羣玉府
借酒時時一軒露延春閣下墨淋漓餘情亦及滄洲趣
好山好水如高人豈直貌敬將心親平生幾夢奉先寺
不知猿鳥猶相嗔君不見飲酒吟詩狂太白曾是匡山
讀書客泥途失腳走憧憧歲晚看雲情脉脉生今益壯
業益修未可造次思巖幽披圖讀墨歌遠遊我無桓玄
寒具油

僧傳古跡霧出波龍圖歌

葉公好龍致真龍精氣所感無不通僧中劉累有傳古
夜夢捷入驪龍宮陽暉焰焰陰魄動左右給侍皆魚蟲
探珠不得逢彼怒轟然鼓鬣興雷風潛窺竊識領其妙
寫之萬楮將無同目睛數月纔一點波浪只尺如層空
乘雲執鏡麾電母跨海獻寶招河宗劉嘗善篆古善畫
得意忘象象乃工為龍為畫了不識有頃喫水投長虹
龍乎龍乎德正中超忽變化天為功絳衣帝子秉節從

九淵喚起赤鯀公永奠鰲極開鴻濛

待制集卷三

欽定四庫全書

待制集卷四

元 柳貫 撰

律詩 五言

同楊仲禮和袁集賢上都詩十首

出塞行瞻日趨朝喜近天
離宮開苑囿馳道絕風烟
瑤水巡非遠峒山歷更繇
甘泉多法從獻賦憶當年

其二

雨水漸衣黑雲砂際目
黃烟開繞黯慘日出已
蒼涼徇

俗高簷帽清心小篆香端居萬里念蕙草惜微芳

其三

昔建寰中業初開徼外山雉城平兀兀沙水淨灣灣朱
夏宸遊正清秋武衛閒叨陪文學乘空愧髣毛斑

其四

謠俗隨方異溝塗隔舍迷醺人唯馬漣勸客有駝蹄殿
角孤花靚城隅雜樹低天涯中夜舞如意昔曾攜

其五

天潢猶白白雲幕故青青積潦摧車軸高風墮箭翎宮
塗丹赭堊殿戶紫金釘女樂蓬萊祕哀簫動杳冥

其六

幄殿層雲障轅門積雪峰奇鷹皆戴角御馬盡飛龍瀚
海將臨幸云亭望陟封青丘大羽獵有事待玄冬

其七

曹務唯章句官規自法程齋扉侵雨潤宴几得風清歷
歷三刀夢行行萬里城明年遂耕隱深仗酒為名

其八

經遊還絕塞際遇復清朝天暑無蒙綸輕寒已御貂盤
空罄屢薦觴至酒頻澆貧病諳為客何慚帶減腰

其九

公子青絲轡王孫綠幃車宴酣風小定舞破日西斜手
擲宮中菓神行海上查築鄰毋自厚儉德不期奢

其十

水草方方善弓弧戶戶便合圍連婦女從成到曾玄雪

羣千家帳冰瓢百眼泉浚稽山更北長望斗光懸

送李文晦僉事易節燕南十首

北候催乘傳東人挽去轅不觀滄海小安識大行尊好
爵隨年進初心與道存老儒當劇部煩護國西門

其二

儒有操存固才須體用該律文徵法具心學左圖開更
借皇華使重光肅政臺析津占分野星動斗間魁

其三

圻全趙際詩教古周南蕩節裴文王輶車備左駮靜
宜觀物變清至飲泉甘河患頻年息民康化易覃

其四

鵬鶚三秋擊騏驎萬里行官聯漢直指經術魯諸生世
或深求法公惟不近名天心與民監上下一昭明

其五

後起或持橐同升已秉鈞三遷分節鉞萬化待彌綸自
足區中寶宜為席上珍平津若開閣未必舍斯人

其六

治獄多陰德傳家有寧馨一夔當奏樂三鳳見儀廷我
實存康濟誰方忌獨醒之官趨便道回首鵲湖亭

其七

婺枯山區外台明海嶼中為生民少魯食力歲宜豐謠
俗方方問檐帷處處通篤恭人自化無欲是深功

其八

歷下名泉衆江南芳草多悠悠增越思往往振燕歌滹

水冰猶壯壇山石未訛北還今易節回雁帶春和贊皇壇山

有周穆王吉日
癸巳四大字

其九

王子朱絲直徐公玉尺方得君同議讞厥類重從陽上

智能旌淑常情失吐剛法家制誅賞端合用其良徐周臣為

使王在中
為僉事

其十

走昔登儒館公時列省曹過逢常不數澹泊適相遭入

里能忘賤游庠辱譽髦臨分勤祝哽何止戀綈袍

鄉友胡古愚久遊京師賦詩念歸睠然起予因
之同作次韵二首

東府銓衡外西廡雅頌邊青雲誰薦賦白日但催年固
欲翔千仞寧能闔九天淹留亦何遂未了北延篇

其二

勞歌非異曲羸服有同袍客路添重趼童年憶兩髦曉
星田漏正春水釣船高為寄吳江夢將慙蜀市遨

天師留國公挽詞二首

襲美神明胄游玄造化徒萬靈觀受印九斗直飛符御
氣今安在迎年故豈誣唯餘室中塵光景見懸珠

其二

齋祠承畫法湯沐啓仙鄉觀物將齊化成真已坐忘空
瞻朱鳥影不見碧雞祥天上飛廉館還應從武皇

大司徒饒國公吳公挽詞二首

周世羣支合秦封故邑開耆英今幾葉爵秩比三台正

倚椿年永何知薤露哀海山雲縹緲真待樂天來

其二

綠玉扶衰杖黃封介壽卮高天流寵錫晚日被光熙菊
秀何妨澹松貞竟亦萎唯應韓擇木不媿歛州碑

送霍通叟著作行祠海嶽

乾御當陽日坤靈効職初尚煩金馬使行探玉函書魁
柄熒熒揭龍光疊疊舒何須封禪草能賦逼相如

送朱本初法師赴豫章玉隆宮四首

北闕層雲紫西山薄雨青薦釐稱秘祀承制領殊庭劍
彩龍雙角衣文斗七星綠章深夜上神爽動秋冥

其二

籍在丹臺上神行劍氣間天香輕冉冉雲珮靜珊珊便
駕青鸞去應騎白鶴還名山九域記須為刻孱顏

其三

鎖蛟唯有柱墮鼠已無家想到真仙宅能回俗士車露
壇春剪柏雲白夜敲茶人境今雙絕長吟採物華

其四

久作江西夢，翻從薊北遊。
雲間朝士鳥，霞外羽人丘。
汎愛非無別，深懷轉益愁。
山靈宜謝我，下瀨有輕舟。

登龍山寺後閣

山閣凌虛起，江天引望開。
連延黃竹浦，隱見白龍堆。
雲樹離離出，風帆杳杳來。
飛車倘堪躡，即此妙高臺。

叔能廉訪寄湖南道上詩次韵奉荅二首

嶽色褰帷看，湖光攬轡收。
詩如陶菊晚，心寄楚蘭秋。
手

內青冥斧筵前白玉舟感時潘騎省有賦莫登樓

其二

荃蘅無可揀
杕栝并宜收
正想三湘月
能涵七澤秋
闢塗非改轍
破浪合操舟
慎重經綸具
遲開五鳳樓

奉陪二府羣公重至北沙因而張飲二首

稍轉龍沙路
沙窮導騎休
大官聯野飲
小客思山遊
樹色爭知晚
峰光悉獻秋
移時偃旌蓋
歸去不驚鷗

其二

展席方成坐隨開擇勝亭日斜詩未就風度酒徐醒間
道收徒御當歌合從伶山公未嘗醉愛看晚峯青

寄贈陳君采二首時聞宴坐西峴山中

翠峴峯千仞峯蹊步步迷人通履屐藉子立堦梯欲
點青雲破須尋白石題是中觀萬象軒豁露端倪

其二

明明刪述軌本始數千年龜玉初誰毀麟膠合更煎如
將求杪忽自可制方圓微子孤吾望申歌意惘然

冒曉雨赴健德門二首

濁潦已波道濃陰欲變曛紛紛蛙黽地汨汨馬牛羣城
邑將無辨人聲僅有聞深思黃道次初不隔浮雲

其二

一月恒多雨初更抵正朝人皆憂沮洳吾復畏漂搖宗
祀申嚴誓官班列具僚勞筋偶羸馬奔走意全銷

初夏齋中雜題

蜀溪溪水先世闢林廬重有江湖思甘從木石居樹

相留宿鳳養竹待竿魚一一幽栖事窮年豈負予

其二

功名如土梗歲月付萍漂病怯衣裘重衰看髣髴凋藥
功遲久久酒樽見昭昭不是吟詩力何方破寂寥

其三

壤隔溪流斷門依野次成初非慵應接自是寡將迎笋
蕨搜山得鹽醢入市營貧居薄滋味盤膾敢求精

其四

經月始一出移時還小勞生涯依馬磨力作問蠶絲藤
刺青陰密楸花紫艷高雨晴看爛漫草徑莫令藉

其五

池岸方如截池波深可洄出門歌小海見客思滄洲魚
沫吹還息蛛絲斷復抽萬生同一馬敢望絕轅軻

其六

紫翠金華色浮空似玉芝岡巒無百里衢路有千岐鶴
背王喬下鯨魚李白騎丹經吾解讀須暇一重披

其七

杳杳京華信栖栖壟畝身
食糜多賸口黔突有勞薪
牲鼎雖無具鮭蔬亦粗陳
朝飡猶一飽不愧在家貧

山中九日三首因寓懷所知

九日西風裏千山落照邊
白頭難諱老黃菊強為妍
酒向鄰家得杯從舊俗傳
陶潛歸計是但覺費詩篇

其二

節序匆匆換風霜稍稍侵
賜萸成往事餐菊是初心
欲

就持螯飲除非跨鶴尋一身將一影猶恨隔雲岑

其三

湖邊秋水觀送客具帆檣忽忽經年夢淒淒九日觴
山中黃葉滿淇上白雲長便作鸞鳳去何妨萬仞翔

聞臨江范德機以母喪哀毀而卒

才名朝士右行義古人中正想招旌起何嗟掩袂窮山
川還寂寞臺閣設穹崇此世丹青筆吾今屬望空

其二

服斬誰非子推形不有身使能穿壙入果勝闕泉親突
兀留文冢淒涼卷釣緡夜臺開幕府還借筆如神

其三

逝矣音容逝淒其翰墨存徒聞春罷相安用哭招魂世
已無耆哲吾猶忝弟昆生芻雖易具終愧玉人溫

哭內

汝世嗟何短吾年亦漸衰胡為齊甲子不共數期頤饋
奠將誰主形神自是離老來多涕淚情至極生悲

其二

年侵常匱食兒大未承家共老心誠切多憂鬢早華即
令加飯食誰更問桑麻喪祭當從禮吾門不貴奢

僧舍除夕四首即簡賈惟貞左司

歲晚窮陰逼城隅古寺寒天時當朔易人事入憂端不
為庖厨薄從知道路難車魚皆外物長鋏未須彈

其二

薄袂齊三服高冠漢兩梁猶慚博士秩有累故人觴塵

土深如許山林耿未忘江梅能厚我隨分予春陽

其三

索寞杯觴外歡娛博塞中老思渾是妄苦語未成工鬢
髮耗耗白燈花焰焰紅摧顏影一丈何負嘒嘒翁

其四

小寄維摩室將乘笠澤舟歲闌書未達春近病先瘳藥
物聊須致丹砂莫苦求憑誰反招隱為我畔牢愁

二月七日與陳新甫甘允從飲范使君亭二首

心賞他年屢湖光此處全春生鷗鳥外人醉杏花前細
竹浸除道殘陽滿繫船毋將比西子吾實愧華顛

其二

醉客休移坐歌姬不受呼山光渾欲滴酒醖未宜孤倒
插浮屠影橫開罨畫圖使君能攬勝堆案有西湖

題瀛海圖因憶舊遊

一幅烟綃展千重海觀開日華浮沉瀝雲氣接蓬萊昔
駕飛龍去還隨汎鷁回吾詩與君畫傾瀉盡瓊瑰

吳門逢張仲舉送之秣陵

東南多積水西北有孤雲
盛氣宜鍾秀明時屬右文
若何開典訓自爾泝河汾
此處山如洛登臨日又曛

其二

烏府聲明地鶚林雅頌筵
尊聞惟有在友教益宜專
莫取三鱣應終期一鶚騫
吾徒負能事攬物要新篇

其三

我輩相期意窮年豈繫名
囊書方遠適舍權欲兼行
南

斗文星動西風早火生他宵有鴻雁載影過臺城

送胡廉使致仕北歸東原五首

在服須耆俊遊廷重老更引年方未艾納節去何輕泰
嶽雲端出長庚月畔明一言興孝弟四海樂盈成

其二

周詩尊耆老漢節重祥刑傳說為霖雨鮮于是福星獨
遊鷗烟烟高舉鳳冥冥出處關時運吾心與道寧

其三

壯節清澄志孤懷獻納忠明揚當盛世休致仰高風
醴酒傾杯綠丹砂入臉紅魯侯宜燕喜春在畫圖中

其四

越部山為畛齊民歲阻饑皇華方攬轡太史亦陳詩
食德何多幸遺榮此一時東門開祖道花影動春曦

其五

種德高槐並留香晚菊鮮鳳毛方瑞世鶴骨正宜年
曠視浮雲表真遊太古前群峰因嶽小霧卷見青天

睡餘偶題五首

青衿嗟老偏白髮向書垂重託卮匱養能忘草木滋潯
陽三畝宅同谷七歌詩境熟初何累情忘適更奇

其二

竹處風清暑梅時雨報豐蕭條歎枕外安隱閉門中樂
物防衰景蓬蒿信薄躬有懷誰與語朋友各西東

其三

此世何多幸予生厚自憐簡書方厲禁裘葛屢催年正

是稊能熟其如橘不遷推藏南郭隱放浪北窗眠

其四

惜此珊瑚玦栖之薜荔牀青山圍坐密白日放歌長客
久違朝籍人誰問夕郎駕車容一駟何必更留良

其五

侯客真當逐虞冠莫重招議刑纔鑄鼎樂聖但歌樵藻
行猶堪挈芝薇幸有苗不能縻爾爵焉用折吾腰

十六夜重對月

白兔不擣藥病衰將奈何酒嫌他日少月似昨宵多寡
鶴無誰和新鴻亦未過兒童解娛老舞影屢傞傞

許益之訃至慟餘有作五首

賢興寧論世道大欲侔天聖路無迂轍師門有絕絃全
歸成此志不朽待他年逝水西風急空林落照懸

其二

宿學滋淪墜微言亦混茫絕帋方未厭占鵬竟為殃正
使羣籤在其如一鑑亡吾哀亦無慟有淚忽盈眶

其三

朱鉛銷日力義理折秋毫折衷群言定離微獨見高誰
能同酌醴更復競鋪糟此道關休否吾非苟譽髦

其四

珠光分後乘驥足仰前塵故想身無事猶如德有鄰五
窮偏害道二豎不憐貧斂服深衣去初何媿古人

其五

世豈無精鑒人惟重所從祇應茅季偉偏善郭林宗午

館聞升復宵隣輟相春鄉粉日凋瘵蜡社哭相逢

題離騷九歌

紫貝東皇席青霓北斗旗
究觀神保意皇恤放臣悲
有客傳芭舞何人執籥吹
楚巫千載恨憑向畫中窺

自題藁卷六首

特立無誰伍前行已莫追
幸留青簡在忍使素心移
奪月陳珠排蒸雲出菌芝
何庸夸險絕吾實厭神奇

其二

成言要有域涉道得無涯錦豈能傷美瑜將不揜瑕迂
疎求拔俗辛苦望名家鄉學乾淳盛端嘉已漸奢

其三

誰昔憑觀化吾今用攝生本根無蹙撥葩澤必敷榮律
呂常相應韶鈞豈自鳴世間有尤物何苦詫盈成

其四

射侯常近正瞽相亦非迂果束諸儒傳誰開九軌塗大
烹祇薄味小出且徐驅佳穀垂秋實因之飽衆雛

其五

大繭扶桑壑危絃絕壑水憑誰絙瑤瑟為我換朱繩涼
夜鮮飈起高秋爽氣澄故多清雅鄭試一辨淄澠

其六

昔有尊元禮今惟侯子雲蛾眉毋見妬後臂亦宜軍語
語推燕說行行避楚氛吾門刪述軌無惑守皇墳

晨起

着地霧成雨過溪風捲雲朝光纔掩靄山氣亦氤氲坐

穩頭慵櫛愁深酒未醺烏啼向人急吾耳不圖聞

歲晏風雪中方壽父連翩惠詩次韵酬答

詩壇劉五字堅壁似長城未必形吾怯深憑寄此情和
聲將律比佳興挾梅清雪夢儵然覺天葩正鏤瓊

其二

聲叟方樊上先生自洛城弦匏惟有合鷗鷺得無情若
昔論三益於今讓獨清仙山倘招隱高步躡飛瓊

其三

麴生不繼往持底破愁城
忽枉詩連軸尤慚譽過情
北風寒燼落小雪夜堂清
安得吹簫侶能來噴紫瓊

長律

五言

贈別宋季任赴甘肅提舉二十韻

寧塞洮河外甘州瀚海隅
羗茅通別譯封域界中區
氓俗風丕變王靈德誕敷
粵初廉吏治近亦好文儒
左學將興蜀西庠昉自虞
懷章煩遠役鞭馬戒前驅
驛路爭迎傳關門不用繻
水經張掖弱山對賀蘭孤
禹鑿班班

迹幽詩往往圖發時梅未夢上日草應芻元宰親加豆
諸生肅詠雩職司雖翰墨佩服已銀朱會觀天荒破端
令士氣麓槎明星是客鄉大酒為徒請播言斯在居夷
聖豈誣高才每流蕩平世匪崎嶇只作三年夢須輕萬
里途旃廬春襲襲笳管曉鳴鳴漿灩蒲萄益馱寒翡翠
爐新篇多慰意許可寄潛夫

故相東平忠獻王挽歌詞

龍虎乘參會麒麟踵畫圖記功宜顯顯論世匪區區肇

敏公維似明徵聖有謨陟庸纔秉軸運化亟旋樞物已
歸坏治人將就楷模開誠登衆正獻可破羣諛夫里同
耕鑿民儀異唯俞景鐘陳備樂桴鼓節投壺尹德湯能
協堯勲益載都方期扶日轂必使麗天衢大角兵端起
清宮袖變殊霜簣飄荏菽風榦落椅梧射影無蛟鰐磨
牙甚豹軀淒涼朱鷺曲狼籍玉麟符立事思常武成書
恨毫姑攀髯應共載升屋竟誰呼厚地難藏烈凝陰為
蓄痛血留衣上碧吟失口中珠遘閔遺多難摧凶激萬

夫義娥還麗景，孳孳掃夷途。狂孽憑三窟，神威覆五湖。
不煩公府牘，終見梟街誅。濁散陽明勝，精垂晦魄蘇。君
門重肅穆，賢路豈荒蕪。殉死身寧贖，觀兵眼未枯。春秋
如有作，盜賊敢稱孤。灞上仍堅壁，驪山罷論徒。董狐千
載後，丹筆詎應無。

送南竺澄講主校經後却還杭州

鹿苑開鴻妙，龍宮閔象玄。間關來幾譯，披發露雙詮。梵
學傳皆正，華文潤乃全。義深含窈眇，道廣極淵泉。論自

諸師造言因半偈宣何曾離性相間亦示機權述妙心
同悟分科緒各牽函盛方秩秩棗剝益縣縣剗剗寧無
舛研磨或更偏遂令迷亥豕不復辨變蛇佛耀昌齡啓
皇明正晝懸五城銀色界三殿寶花筵重見弘經日如
逢出震年詔徵皆宿德御講盡真筌此士孤山隱前身
華頂眠野雲生靜慧江月湛空圓天上青猊座人間白
馬羈微君能引重於世孰昭先晦魄風簾燭頑陰雪屋
檀聲將為律呂眼豈混朱鉛疑句多多證蕪辭一一鐫

法珠終照乘宗鏡已當銓煥爛金泥字牽連玉簡編指
河符聖歷穿石畢僧緣竣事纔敷奏疏榮亟勞還萬回
袍錦麗大覺鉢孟鮮尚食來珍供司農輟禁錢龐恩流
濺濺鷁影去翩翩昨夢寧非蝶遲歸誤信鵲望京猶綠
樹入寺始紅蓮雨外排千耦烟中聽兩舷屢盈南竺戶
擢集北湖船巖觀應增聳川容若載蠲應求隨燥濕鑽
仰喻高堅夏懺朝朝禮秋燈夜夜燃固知融至理直可
寄單傳客袂難為別朝簪未放捐愛門思結社食力待

治田苦笑昌黎慙深懷惠遠賢獻花憑一詠安有筆如
椽

用韻重賦故相挽歌詞

元勲開社福盛德見儀圖烈烈神明胄恢恢禮樂區帝
猷咨相度祖笏付孫謨柱石需成厦機衡實應樞舜裳
施絺繡歐冶用型模寧使千夫謬毋容一士諛文多徵
杞宋舞或陋巴俞昧旦張謀幄嚴更聽漏壺投姦維四
裔墮邑盡三都制政方如律藏兵已在衢豐從倉卒起

事與古先殊輻說慚與衛堂傾歎屋梧使來俄覆醢祭
罷孰陳軀西陸無回轡中堦有圻符望氛疑梓慎指海
信麻姑月食終能掩雲乘不可呼甚聞童叟泣何止僕
人痛抵鵲將忘玉探驪誤得珠殞身臣報主之死婦從
夫未必衣冠辱終令耳目塗繼明光宇宙流惡蕩江湖
已正軍門戮尤嚴聖筆誅陰消寧瞠瞠震往遂蘇蘇天
紀初誰擾民蹊亦暫蕪偃禾休反熟卧柳不生枯豈恨
仁賢殄深愁屬望孤封圻荒社圃官姓啓申徒秋草年

年碧臨風涕欲無

送叔能左司出守會稽

南伯分符重東曹
載筆先憂勞鼎軸
共理付藩方日月
封圻內江湖魏闕
旁治心兼孔老踐
迹到龔黃必使操
刀割毋令學製傷
閣鈴傳刻漏齋舫
製書囊賞憶荷花
靚材憐竹箭良謝
公多載酒賀老欲
歸鄉惜別燕歌短
凝情越思長風輕
文鷁動雲駛錦帆
張鵠去宜高舉鷗
來豈遽忘為農託
鄰化安隱事耕桑

次韻答鄉友吳立夫見寄之作感別懷歸情在
其中矣

宇宙方來事江湖獨往人扶搖遺短翮濡沫到窮鱗誤
作軒裳夢終慙稻錦身跡雖侔燥濕學豈混疵醇跼步
逢多躓虛懷待一振屈伸乘卦氣消息候天鈞喜際三
雍啓還依六籍親馬羈從幸日螢案潔餐晨騰口虞官
謗稽謀信卜陳踐更非顯陟遷秩遂為真清廟方惇禮
容臺忝末塵卑卑論燕爵憲憲望麒麟緬想閔居賦猶

存弟子紳國鄉誰尚友興皂或稱臣飛翰因來客分光
肯照鄰之人芻有束何物稼盈困矍圃初登射驪山適
罷巡玉全遭別足淵靜得藏珍接席連芳晝看花惜好
春言筌開窈窕理窟至馴馴蓄思文俱銳修名實與賓
逝將熙孔業由此樂顏仁淹泊思同社羈孤若異倫宜
休寧俟斥漸老最憂貧夙願惟耕釣浮雲謝鼎茵滅行
無聽漏觀涉即知津孤首求吾正螽斯詠爾詵粉榆應
不改蘿蒿重相因惜遠接青菊期歸睇綠蘋題詩緘恨

去離緒極紛綸

開府大宗師張仁靖真人昇仙詞

聖歷延徽朗玄筌闡化洪至人惟有造妙道不無功肇
武侔黃石儲精自碧嵩器非群物囿夢與九門通宣室
承恩始甘泉載祀隆時方陳象舞治欲致橐弓清淨言
初入高明聽已聰寶慈深示世敦素實希風四海臻寧
壹三靈畢會同降祥宜簡簡合漠本慳慳曉景來芝蓋
宵光下竹宮畫幡飄婀娜權火暎腫朧練日迎嘉應祈

年獲屢豐鼎成藏題題劍動役靈籙立在螭頭右行參
豹尾中披衣垂白羽徒御列青童宸眷疏榮數仙班進
秩宮鎮圭函練藉篆玉飾雕蟲仰陟蜚廉觀聞呼太極
公桎春鉤液瀉燭夜絳綃籠圖象凌烟秘樓居複道崇
月臨笙宛轉颺舉佩丁東豈止南宗重還將北顧空八
維關地軸七澤納雲夢鯨力森疑破淵襟澹若沖正聲
諧杳眇顙氣徹昭融汎覽乾坤大何知霧雨濛足誠因
獻則耳孰為音聲制勝生機活憑虛獨見充真源觀浩

浩迷輒或忽忽士類常推轂師資亟擊蒙內經縹藥笈
疊組付蘭叢固有登三事誰其詠五總雍容元老席懇
惻大夫忠客拜先加手朝回更鞠躬筵敷素純厨味
屏葦葱髮暎睂毫碧丹浮輔頰紅金莖潑沆瀣珠斗戴
崆峒漏盡冰生稼窗明彩駕虹給扶殊未老宴坐忽長
終牆上排蛟翼輶前引鳳甬翩翩龍去遠望望鶴飛翀
遊戲陵三境徘徊過九峻捲簾瞻漢準端冕侍虞瞳未
議當凝命均釐及惠窮雖然形已蛻共想石堪礱誅德

歸詞掖歌詩諗廟工陰靈環顛廟陽木樹椅桐殿角猶
遺烏泉間莫銅銅層霄如盼蠻下土故龐鴻

大雪戲詠

霰集先驚密雲垂陡覺低穿帷繞巧入擁砌已深迷蟾
影宵翻鵲犀光晝駭雞投虛知井幕蒙險失巖梯九地
藏膏澤千門委壁圭黃輿增厚載玄武蟄幽栖忽灑聲
尤急中休氣轉淒辨方惟有服封谷不須泥稍喜夷塗
闕多憂陷穽擠世將還撲素壤盡徹青黎固欲殊廉角

於何畫町畦溟池涵上下瀼岸渺東西縞舉仙人袂
明玉女閨混淪收日脚軒豁露坤倪剪毳巾成氎吹灰
室覆緹妖氛隨蕩析闌茸謝槌提勁竹猶遭挫疎梅恰
吐齊若為散鱗甲無已戮鯨鯢覓日消遲見豐年卜可
稽漁歸裝襪襖兒戲象狻猊正苦貧衣綻邴禁凍面薰
曉罌初撥醴午枕更吹薺幾夢斟羔唱徒聞索飯啼掩
關誰掃軌返棹卻尋溪踐迹嗔鴻爪全生媿馬蹄莫抽
梁苑思爭効漢袿題

送何德芳叅議登朝兼志王許二公同升黃閣之喜

道揆尊良弼忱恂屬議臣使星離左次卿月映中宸巖
石傾瞻久鋒車趣召新一陽迎日至四序首王春出號
乾剛正揚廷巽命申廟堂深眷倚帷幄重咨詢必使言
多補猶為國有人凡材資愛養全體務彌綸締繡身惟
服甄陶器在鈞土毛因地產財計繫邱民藪澤將無竭
閭閻冀少伸同胞兼隱痛衆樂賴調均並采葛藟論宏

推草木仁通班已文陸步趾即平津際遇於斯盛休祥
自我臻治功開六典淳曜仰三辰臯禹寅初協勲華迹
豈陳逢徵黃霸入顧念馬卿貧象闕心徒戀鷗波興與
馴但期行葦賤不作道邊塵

今體詩六十韻贈餞正傳之官池陽述學言懷
見乎辭矣

昔有推鄉學今誰侮聖言尚辭淪曲藝執業謝專門製
錦何妨美更刀竇太煩爰從王氏作重喜魯經存集註

初刊定傳疑併討論七篇賢所訓一貫道攸根翼傳茲
猶準希蹤孰可捫仁巖頃顏剝建水泮齋云或者傷麟
趾嘻其狀虎賁走雖名惡子君豈負諸孫直想披吾奧
毋徒闖彼藩律元求秒忽車用飾輪轅堂陸尊卑分淵
泉左右原緩行惟視履妙契必亨屯固謂炊將熟終期
溺是援蟾梯榮峻陟鵬路藹孤騫正取能充拓何嘗志
飽溫銀章凌霧雨朱紱賁邱園負弩方前導乘車且載
奔威行秋浦曲象動歲星垣入署梅花曉開筵草色暄

琴聲春寂寂簾影晝掀掀建德當時國清溪若處村再
畚宜黍稌庶植間蘭蓀明府今為政窮閭自不冤使民
安蜡臘戒吏絕壺飧可得防鰥寡常須並放豚馬驚連
軸折魚滄尺波渾警靜山無盜年登社有鰭雞窠對翁
稗肉譜繫仍昆拊已心惟小趨風禮更繁加遽薦廷實
斂板候戎軒勿枉中懷璧寧甘右屬韃因游問花柳須
暇采蘋繁客夢西堂句賓筵北海尊神應歆豈弟世豈
混昭昏穩躡飛鳧舄徐升畫鹿轡胸中五色線天上九

重閣補袞功誠著觀書眼未睂葆光非匿景絕利不離
源有客愚溪柳其人太學蕃方時征彙吉自信括囊坤
化瑟遲當改樵枰看屢翻先機輕絳濯末患稔晁爰此
豈猶堪出予將矢勿諼采芳留晚節曝背媚朝暾獨幸
聯衣袂頻容漬酒痕親仁情正切惜遠思如燔薄贈將
吳紵佳占獻楚燂瞻雲渺江漢掬月在瓶盆生色滋融
盎清光與吐吞各持修省事永慰別離魂列辟無前績
先師罔極恩名山嚴泰華大器屬璵璠法古承三統書

年表一元榮枯徵斷簡消息候微萱避弋齊縹鳳懲羹
忌染龜讒夫行似蜮君子化為猿計熟非稊稗維豐侯
芑糜短篇墻及仞企望倚崑崙

送翰林書寫邵從聖赴臨淮尹

故人為縣去聽我說臨淮白木塍塍溢青山岸排牛
耕多種秫魚樵亂編柴貴儉民常足知柔俗易懷無庸
輕保障尤欲念巔厓美錦休傷製清琴莫近哇心將千
古契興與四時佳池影花當檻簾陰草滿堦揮毫還有

待退筆未須埋禁鬱羅三館招旌下兩涯煌煌良史策
寂寂太常齋豈必長安客東方獨好俳

絕句五言

賦王氏新安嶺南山居十詠

清江釣月

月魄秋在水景光依蓼蒲神魚不受釣腦滿生明珠

空谷耕雲

濕濕雲生岱曉晴山崦紅仙人來種玉二耜亦同功

蒼峯卓筆

黔川數斛墨發地見龍從恠來聞石語山立銳頭公

碧巘開屏

松門纔數曲疊翠似鈎連玉女有時下香爐開紫烟

松林巢鶴

林表浮邱宅蕭穆一蓋張髦毛見飄墮有客拾松黃

雪澗浮龜

顛顛太古雪參差洛書文罡風恐吹裂騎去入玄雲

峻嶺扶車

前驅破聲確見石不見車誰實挾兩轂吾行得舒徐

圓岡揭斗

坡陀九點烟象斗排雲端疑此精化石即是星宮官

雙溪合璧

洩寶泉始漫洄流凍未消熒熒玉氣合湛湛劍光搖

古寺垂虹

僧歸度橫杓笠影在清溪嗟彼善幻者嚙水投虹蜺



待制集卷四